

財政

二百三十二

九月

竊准商部咨開本年四月二十二日本部具奏津埠銀根較緊請多鑄銅圓一摺奉 旨依議欽此咨行到臣欽遵伏查銅價增昂私燬漸多制錢因而日少臣自接收天津時滿市沙錢商民交困曾遴委道員周學熙趕速籌鑄銅圓俾資補救惟開局之始籌款維艱鑄本則息借商款機器則零星配集竭力經營每日現出銅圓三十萬枚發商行用羣稱便利戶部亦時來提取其餘利所入即以撥供工藝局考工廠工藝學堂蒙小學堂之需二年以來漸臻成效第制錢奇絀銅元行銷日廣核計所出僅足供給津埠尙未通行外邑疊擬大加推廣以期鑄數增多且以北洋興辦各項要政所在需款雖經臣多方籌畫時苦無米爲炊若多鑄銅元則計增贏餘亦可協濟要需惟以鑄本難籌購機費鉅旋議旋輟現經商部奏請飭下設法推廣加工多鑄儘鑄儘放總期鑄數日多銀價漸平商務日臻起色各等因自應遵照迅圖推廣已飭該局員寬籌鑄本增購機器加工添鑄以收推行漸廣之效戶部現亦籌辦鼓鑄已在津埠設局建廠年內當可開鑄惟順直幅員闊大南北交通當此銅貴錢少之時即使併力廣鑄亦斷非三五年所能足用是推廣辦法正宜多多益善也謹 奏奉 硃批戶部知道欽此

西安將軍長陝西巡撫升等會奏試辦陝西旗屯請用糧道報効專款以符原議摺

竊奴才升允於光緒二十五年在陝西糧道任內詳請節省浮費常年報効銀四萬兩作爲旗兵屯田專款由升任撫臣魏光燾奏蒙 俞准在案隨因甘軍駐紮畿輔餉項支絀准戶部咨於此項旗屯經費款內撥爲該軍二十六年餉需此後連年荒歉開墾爲難而糧道報効銀兩又未能如數解交是以旗屯一事迄未舉辦伏思八旗兵丁生計日艱若不設法營謀勢必貧弱交患現時陝省續備屯軍先後開辦業逾兩年該旗兵等目見耳聞已足以生其羨心而警其惰志又值年歲轉豐牛籽皆不昂貴趁此舉興屯政不可再遲惟旗兵好逸畏勞久成錮習非予以重利不足動其心非策以萬全不足安其志奴才等籌畫既定先行出示曉諭許以屯軍已開之熟地撥歸旗兵墾種除滿營原有錢糧外仍照屯軍章程給餉該旗兵等始欣然踴躍紛紛投報現計挑選壯丁已得五百六十餘人續到者尙源源不絕擬於濱渭草灘一帶已經墾熟之地令屯軍讓出若干先行試種以後招集日多再行推廣俾旗兵等易謀生計可由富而強此奴才升允五年以前之夙志遲之又久始獲開端正以利之所在費必先之天下事之久議不決者無非爲經費計也查此項經費前因歲荒糧少道庫空虛奏請將二十六七兩年欠解之數准予豁免並二十八年減半報効以示體恤至二十九年以後收數較加業已規復原額計司庫現存此項銀款共六萬餘兩提四五萬兩

財政

二百三十四

九月

並將本年報効之款全數作本生息留辦西安駐防中小學堂另案奏報外尙餘銀一二萬兩擬請先作本年旗屯開辦經費以後此項專款仍照原議截儲備撥隨時奏明辦理其詳細章程仿照屯軍辦法略加變通擬議妥協再行分別奏咨總之旗兵生計爲今日萬不可緩之圖而糧道報効一款又指明爲旗屯之費款既有著事或不難此又奴才等所不能不籲懇 聖主之前者也謹 奏奉 硃批戶部知道欽此

山東巡撫周奏山東工需緊要請將雙月班次並分指等捐減成核收片

再前因惠民利津等縣黃河漫溢工用浩繁經臣奏奉部議准將常例七項捐輸例定十成銀數由山東收捐專作黃河辦工之需聲明此係山東河工重要是以准其收捐他省不准援以爲例等因於光緒二十八年九月十九日具奏本日奉 旨依議欽此欽遵辦理在案無如例定銀數較鉅捐生無力報捐每多裹足且廣西四川等省援案奏准開辦捐生祇有此數彼盈此絀勢所必然是以一年有餘山東所收七項常捐未能暢旺查前准戶部咨議覆政務處酌擬變通捐輸定章內稱凡報捐雙月班次花樣等項四品以上按五成收捐五品以下按四成收捐又新海防例實職人員如在部庫加捐分發指省自應按照減成章程核收至各省代收七項捐輸案內所收分發指省仍應查照奏准例定十成銀數收捐等因